

Biblia alang sa Kabataan motanyag

Ang Unang Pagkabanhaw



Gisulat ni: Edward Hughes
Gihulagway ni: Janie Forest
Alastair Paterson
Gipahaom ni: Lyn Doerksen
Gihubad ni: Christian Lingua
Gipagawas sa: Bible for Children
www.M1914.org


BFC
PO Box 3
Winnipeg, MB R3C 2G1
Canada

©2024 Bible for Children, Inc.


Pagtugot: Mahimo kang mokopya o mopatik niini
nga estorya, ayaw lang ibaligya.

1

Ang babaye nagtindog didto
sa saba nga kilid sa bungtod.
Ang masulob-on niya nga
mga mata nagatan-aw
sa makalilisang
nga talan-awon.
Ang iyang Anak
kahimatyon. Ang
ang inahan mao
si Maria, ug
nagtindog siya
sa dapit diin
si Jesus
gilansang
sa krus.



2




Giunsa pagkahitabo niini? Nganong ingon niini ka makalilisan ang kataposan sa nindot nga kinabuhi? Nganong misugot ang Dios nga ang Iyang Anak ilansang sa krus aron mamatay? Nasayop ba si Jesus kon kinsa Siya? Napakyas ba ang Dios?

3




Wala! Wala mapakyas ang Dios. Wala masayop si Jesus? Nakahibalo gyod si Jesus nga patyon Siya sa daotang mga tawo. Bisan sa gamay pa si Jesus, ang tigulang nga si Simeon nag-ingon kang Maria nga may kagul-anan nga moabot.

4




Pipila ka mga adlaw sa wala pa patya si Jesus, may babaye nga miduol ug mibubo ug pahumot sa tiil ni Jesus. Mireklamo ang mga tinun-an, "Nag-usik ra siyag kwarta." Miingon si Jesus, "Maayo ra ang iyang gibuhad. Gihimo niya kini alang sa paglubong kanako." Makapahibulong nga mga pulong.

5




Human niini, si Judas nga usa sa 12 ka tinun-an ni Jesus miuyon nga iyang itugyan si Jesus ngadto sa pangulong pari kay gibayran siyag 30 ka kwarta nga plata.

6



Panahon sa Pista sa Pagsaylo sa mga Judio, mikaon si Jesus sa kataposan nga higayon uban sa Iyang mga tinun-an. Gisultihan Niya sila sa kahibulongan mga butang mahitungod sa Dios ug sa Iyang mga saad sa tanan nahigugma Kaniya. Unya gihatag ni Jesus ang pan ug kupa aron ilang salohan. Mao kini ang magpahinumdom kanila sa lawas ug dugo ni Jesus nga gihatag aron mapasaylo ang mga sala.

7



Unya gisultihan ni Jesus ang Iyang mga amigo nga may magluib Kaniya, ug nga manago sila. "Dili mi managan," miingon si Pedro. Apan si Jesus miingon, "Sa dili pa motuktugaok ang manok, katulo na ka moingon nga wala ka makaila Kanako."


8



Unya human niadto, miadto si Jesus sa Tanaman sa Getsemane aron mag-ampo. Ang mga tinun-an nga uban Kaniya nangatulog. Nag-ampo si Jesus, "O Akong Amahan ... Molabay ra unta kini nga kupa Kanako. Dili ang Akong pagbuot ang matuman, apan ang Imoha."

9

Kalit may miabot nga pundok sa mga tawo didto sa tanaman. Si Judas ang nag-una. Wala mosukol si Jesus. Apan giabis ni Pedro ang dalunggan sa usa ka tawo. Unya hilom ra nga gitapli pagbalik ni Jesus ang dalunggan sa tawo ug giayo siya. Nahibalo si Jesus nga dakpon Siya kay kabahin man kini sa plano sa Dios.



10

Ang mga tawo midala kang Jesus ngadto sa balay sa pangulong pari. Didto ang mga pangulo sa mga Judio miingon nga kinahanglan patyon si Jesus. Sa dili layo, si Pedro nagtindog ug nagbantay dapit sa daob sa mga mga sulugoon.



11

Katulo may mga tawo nga mitan-aw ug miingon kang Pedro, "Kauban ka ni Jesus!" Katulo usab miingon si Pedro nga dili. Sakto gyod ang giingon ni Jesus. Nanungo pa si Pedro ug nanumpa.



12


TUKTUGAOK

Unya mituktugaok ang manok. Mora kinig tingog sa Dios alang kang Pedro. Sa pagkahinumdom niya sa gisulti ni Jesus, mihilak pag-ayo si Pedro.



13

Nagbasol usab si Judas. Nahibalo siya nga si Jesus walay sala o sayop. Giuli ni Judas ang 30 ka kwarta nga plata. Wala kini dawata sa mga pari. Gilabay ni Judas ang kwarta, milakaw siya - ug naghikog.



14




Ang mga pari midala kang Jesus sa atubangan ni Pilato, ang gobernador nga Romanhon. Miingon si Pilato, "Wala akoy nakitang sayop niining tawhana." Apan ang pundok sa mga tawo misinggit, "Ilansang Siya sa krus!"

Ilansang Siya sa krus!"

15


Sa kataposan, misugot si Pilato, ug gisilotan si Jesus nga mamatay sa krus. Ang mga sundalo mikulata kang Jesus, miluwa sa Iyang nawong, ug milatigo Kaniya. Nagbuhat silag korona nga mga tunok ug gisul-ob sa Iyang ulo. Unya gilansang Siya sa krus nga kahoy aron mamatay.



16

Nahibalo nang daan si Jesus nga ingon niini ang Iyang kamatayon. Nahibalo usab Siya nga ang Iyang kamatayon modalit og kapasayloan sa mga makasasala nga mosalig Kaniya.


Dihay duha ka kriminal nga gilansang usab sa krus tupad kang Jesus. Ang usa mituo kang Jesus - ug miadto sa Paraiso. Ang usa wala ra.



17


Human sa pila ka mga oras nga pag-antos, miingon si Jesus, "Natapos na," ug namatay. Natapos na ang Iyang buluhaton.

Gilubong siya sa Iyang mga amigo didto sa lubnganan nga pribado.




18

Unya gitrangkahan sa mga sundalo ang lubnganan ug gibantayan. Walay masulod - o makagawas.




19

Kon kini mao ang pagtapos sa estorya, makasusubo kaayo. Apan ang Dios may gibuhat nga Kahibulongan. Si Jesus wala magpabilin nga patay!




20

Sayo sa buntag sa unang adlaw sa semana, may mga tinun-an ni Jesus miadto ug nakita nila nga giligid na ang sira nga bato. Pagtan-aw nila sa sulod, wala na didto si Jesus.




21

Nagpabilin ang usa ka babaye nga naghilak didto sa lubnganan. Miduol si Jesus kaniya! Malipayon siyang nagdali pagbalik aron sultihan ang ubang mga tinun-an. "BUHI SI JESUS! NABANHAW SI JESUS!"



22

Unya miadto si Jesus sa mga tinun-an, ug mipakita sa Iyang kamot nga may uwat-linansangan. Tinuod diay. NABANHAW SI JESUS! Gipasaylo Niya si Pedro sa pagluib Kaniya ug misulti Siya sa mga tinun-an nga sultihan ang tanan bahin Kaniya. Unya mibalik Siya sa langit diin Siya naggikan.



23

Ang Unang Pagkabanhaw

Estorya gikan sa Pulong sa Dios, ang Biblia,
makita sa

Mateo 26-28, Lucas 22-24,
Juan 13-21

"Ang pag-abot sa Imong mga Pulong nagahatag og kahayag." Salmo 119:130

24

Ang Kataposan

Kini nga estorya gikan sa Biblia nagasulti kanato bahin sa kahibulongan nga Dios nga nagbuhat kanato ug gusto Niya nga kita makaila Kaniya.

Nahibalo ang Dios nga nakabuhat kitag daghang daotan. Gitawag Niya kini nga sala. Kamatayon ang silot sa sala. Pero nahigugma pag-ayo ang Dios kanato. Iyang gipadala ang bugtong Niyang Anak nga si Jesus aron mamatay sa krus ug silotan tungod sa imong mga sala. Unya nabanhaw si Jesus ug mibalik sa Langit! Kon motuo ka kang Jesus ug mohangyo nga pasayloon ka sa imong mga sala, himoon kana Niya! Moanha Siya ug mopuyo sulod kanimo karon, ug mopuyo ka uban Kaniya hangtod sa kahangtoran.

Kon motuo ka nga kini ang tinuod, ingna ang Dios: Ginoong Jesus, ako nagatuo nga Ikaw Dios, ug nahimong tawo aron mamatay alang sa akong mga sala, ug karon Ikaw nabuhi pag-usab. Anhi sa akong kinabuhi ug pasayloa ang akong mga sala, aron mabag-o ang akong kinabuhi karon, ug unya makig-uban ako Kanimo hangtod sa kahangtoran. Tabangi ako nga motuman Kanimo ug magkinabuhi alang Kanimo ingon nga Imong anak. Amen.

Basaha ang Biblia ug pakigsulti sa Dios kada adlaw! Juan 3:16

26

